

**Apequteqaat aallaavigalugu oqallisissiaq: Sanaartugassanik suliarinnittussarsiuussisarnermi tamakkiisumik neqeroortitsisarneq atorneqartillugu, tamakkiisumik neqeroortitsisarnermik tiguisup suliffeqarfiit mikinerit assigiinnigisitsineqanngitsumik ilinniartullit salliutillugit suliakkiisarnissaat pillugu oqallisissiaq?**

(Inatsisartunut ilaasortaq Jakob Skade, Kattusseqatigiit Partiiat)

**Akissuteqaat**

(Ineqarnermut, Attaveqarnermut Angallannernullu Naalakkersuisoq)

Kalaallit Nunaat namminersortoq suli ukiuni amerlasuni sanaartornikkut unammilligassaqarpoq. Ataatsimut isigalugu inissianik iluarsaassinissaq nuna tamakkerlugu pisariaqartinneqarpoq. Peqatigisaanik pingaartumik illoqarfinni anginerusuni inissianik pisariaqartitsisoqarpoq.

Naalakkersuisut isumaqarput, isumalluutissat pigisatta ikittuinnaasut pissarsiviunerpaasinnaasumik atornissaat pingaaruteqartorujussusoq.

Naalakkersuisut isumaqarput sanaartornermut suliassaqarfimmi inuiaqatigiinni unammilligassat, suliffeqarfiit nunaqavissut – angisuut taamatullu minnerusut – annertunerpaamik peqataatillugit aaqiivigineqartassasut, taamaalillutik suliffeqarfiit piginnaasaminnik annertusaallutillu inerisaasinnaassallutik.

Tamanna suliniutit makkua ilaatigut neqeroortitsisarnermut inatsit<sup>\*)</sup> tunngavigalugu piffissami qaninnerpaami Naalakkersuisunit aallartissamaarneqartut aqutugalugit pissaaq:

- Sanaartornermik suliaqarnermi ilinniartussanik atorfinitsisisarnissaq pillugu nalunaarummik nutaamik atuutsitsilernissaq.
- Sanaartugassat suliarineqarnissaannut pisortat neqeroortitsineranni suliffeqarfinnik nunami maani angerlarsimaffeqartunik peqataatitsisarnissaq aallaaviatigut tamatigut piumasaqaataasassasoq pillugu kaajallaasitamik atuutsitsilernissaq.
- Pisortat sanaartortitsineranni nakkutilliinerup sukannernerulersinneqarnissaa, tassani ilaalluni suliffeqarfiit ilinniartussanik atorfinitsitsisarnissamik piumasaqaammik malinninersut misissorneqartarnerata sukannernerulersinnissaa.
- Sanaartugassanik pilersarusiornermi nakkutilliinermilu suliassat annertunerusut neqeroortitsivigineqartarnissaat pillugu maleruagassanik suliaqarnissaq.

1. august 2007-imiit neqerooruteqartarnermut inatsisip ukioq manna januaarip ulluisa aallaqqaataanni atuutsinneqalernissaa tikillugu, pisortat sanaartugassaataannut 3 mio. koruunit sinnerlugit nalilinnut neqeroortitsisarnermi, suliffeqarfiup sanasussap suliassaq pissarsiarissaguniuk ilinniartunik atorfinitsitsinissaa piumasarineqartarpoq. Naalakkersuisulli ”sanaartornermut isumaqatigiissusiornermi ilinniartoqartarnissamik” piumasaqaatip

kingunerisaanik ilinniarfiit qassit pilersinneqarsimanersut pillugu uuttortaanernik pigisaqanngillat.

Taamaattorli Naalakkersuisut pisortat sanaartortitsinerini ”sanaartornermut isumaqatigiissusiornermi ilinniartoqartarnissap” tunngavigineqartarnera ingerlateqqinniarpaa. Taamaattumik aasap ingerlanerani sanaartugassanik suliaqarnermi ilinniartoqartarnissaq pillugu nalunaarusiaq nutaaq saqqummiunneqassaaq.

Suliffeqarfiit minnerusut sanaartugassanut annertuunut tunngatillugu peqataasinnaanerat eqqarsaatigalugu, suliassat taamaattut suliffeqarfinit anginerusunit, pisariaqartinneqartunik pisinnaasaqarlutillu piginnaaneqartunik suliarineqartarnerat pitsaanerpaasarpoq.

Suliffeqarfiit minnerit, sanaartugassat annertuut suliarineqarnissaannut suleqataarusuttut, suliffeqarfinit allanik kattusseqateqartarnissaannut Naalakkersuisut kaammattuinnarsinnaavaat, taamaalillutik unammillersinnaanerulissammata. Tamatuma saniatigut Naalakkersuisut tunngaanniit suliffeqarfiit kattunnissaminnik aaqqissuusseqqunarput, aammalu sanaartornermi suliassaqarfimmi kattuffiit suliffeqarfinit ilaasortarisaminnut, kattunnissaminnik isumaliutersuuteqartunut siunnersuisarnissaat tapersersuisarnissaallu kissaatiginarluni.

Naggataatigut erseqqissaannarusuppara inissianik attartortut nalinginnaasut akilersinnaasaannik sanaartortarnissaq Naalakkersuisut ersarilluinnartumik anguniagarimmasuk. Tassalu siunnerfigineqarpoq inissianik sapinngisamik akikinnerpaamik soorunalimi aamma isumannaatsumik pitsaassuseqartunik sanaartortoqartassasoq.

Taamatut aallarniutaasumik oqaaseqarlunga, matumuuna oqallinnissaq, kinguneqarluartussatut pilersitsiviusussatullu neriuuteqarfigisarput ammarpara.

) Inatsisartut ataatsimiinnerminni kingullermi partiinit tamanit taperserneqartumik sanaartornermi neqerooruteqartitsis-  
arneq pillugu inatsit nutaaq, ulluinnarni neqeroortitsinermit inatsimmik taagorneqartoq, akueraat.

[http://www.lovgivning.gl/gh.gl-love/dk/2009/lt/L\\_nr\\_11-2009\\_tilbud/L\\_nr\\_11-2009\\_dk.htm](http://www.lovgivning.gl/gh.gl-love/dk/2009/lt/L_nr_11-2009_tilbud/L_nr_11-2009_dk.htm)

inatsit sanaartugassanut pisortanit, tassalu imaappoq Namminersorlutik Oqartussanit kommuninillu, neqeroortitsivigi-  
neqartunut atuuppoq.

Neqerooruteqartarnermut inatsit unammilleqatigiinnissamut assigiimmillu pineqarnissamut aalajangersakkanik  
pingaarnernik imaqarpoq. Tassalu neqerooruteqartarnermut inatsimmi allassimavoq, neqeroortitsisup  
naammaginartumik unammilleqatigiittoqarnissaa anguniarlugu periarfissat atorluassagai. Tamatuma saniatigut  
neqeroortitsisoq neqerooruteqartut akornanni assigiinngitsinertaqanngitsumik neqeroortitsissaaq, tassalu suliasamik  
tunniussineq kinaassusersiunngitsumik assigiinngitsinertaqanngitsumillu ingerlanneqassaaq.

Neqerooruteqartarnermut inatsimmi soorunami pisortat aningaasaliissutaat atorlugit sapinngisamik annertunerpaamik  
sanaartortoqarnissaa siunertarlugu, unammilleqatigiinnerup sapinngisamik annertunissaa siunertarineqarpoq.

Kiisalu neqerooruteqartarnermut inatsimmi sanaartugassat, Namminersorlutik Oqartussanit kommuninillu  
neqeroortitsivigineqartut suliarineqarnerini, ilinniartunik atorfinitsitsinissamut maleruagassiornissamut Naalakkersuisut  
periarfissinneqarput.